

UNIVERZITET U SARAJEVU
ELEKTROTEHNIČKI FAKULTET U SARAJEVU

Broj: 01-2128/17
Sarajevo, 05.06.2017. godine

Na osnovu člana 124. stav (2) Zakona o visokom obrazovanju ("Službene novine Kantona Sarajevo", br. 42/13 - prečišćeni tekst i 13/15), člana 92. Statuta Univerziteta u Sarajevu, Odluke o vrednovanju rezultata postignutih prilikom polaganja prijemnog ispita za upis u prvu godinu prvog ciklusa studija, u studijskoj 2017/2018. godini broj: 01-1445/17 od 03.04.2017. godine i prijedloga dekana Elektrotehničkog fakulteta u Sarajevu broj: 02-2113/17 od 02.06.2017. godine, Vijeće Elektrotehničkog fakulteta u Sarajevu na 24. redovnoj sjednici održanoj 05.06.2017. godine, donosi

ODLUKU

o kriterijima za rangiranje kandidata za upis studenata u prvu godinu prvog ciklusa studija na Elektrotehnički fakultet u Sarajevu u studijskoj 2017/2018. godini

I

Ovom odlukom utvrđuju se kriteriji za rangiranje kandidata za upis studenata u prvu godinu prvog ciklusa studija na Elektrotehnički fakultet u Sarajevu u studijskoj 2017/2018. godini.

II

Upis kandidata u prvu godinu prvog ciklusa studija, na Elektrotehničkom fakultetu u Sarajevu, vrši se u skladu sa planom upisa studenata u studijskoj 2017/2018. godini.

Pravo na upis u prvu godinu prvog ciklusa studija ostvaruju kandidati koji se prema ostvarenim ukupnim rezultatima (opći uspjeh, uspjeh iz maternjeg jezika, matematike i fizike, rezultat prijemnog ispita, takmičenja) nalaze unutar broja kandidata koji je odobren planom upisa u prvu godinu prvog ciklusa studija, u studijskoj 2017/2018. godini, na odgovarajućem odsjeku studija.

III

Rangiranje kandidata i prijem studenata u prvu godinu studija vršit će se u zavisnosti od broja bodova koje kandidat osvoji po osnovu:

- **općeg uspjeha**

Broj bodova po osnovu općeg uspjeha iznosi maksimalno 20, a utvrđuje se tako što se prosječna ocjena iz svih predmeta u svim razredima, zaokružena na dvije decimale, pomnoži sa 4.

- **uspjeha iz maternjeg jezika, matematike i fizike**

Broj bodova po osnovu uspjeha iz predmeta maternji jezik, matematika i fizika vrednuje se sa maksimalno 40 bodova. Ovaj broj izračunava se tako što se najprije za maternji jezik i matematiku izračunava srednja vrijednost ocjene u sva četiri razreda, a za fiziku u posljednja dva razreda u kojima je kandidat imao fiziku. Ukoliko kandidat nije imao neki od predmeta u nekom od razreda, za taj razred se uzima ocjena 0. Zatim se izračunava srednja vrijednost ocjene za ova tri predmeta, zaokruži na dvije decimale i pomnoži sa 8.

- **rezultata postignutih na prijemnom ispitu iz Matematike**, a vrednuje se sa maksimalno 40 bodova.

Prijemni ispit vrši se testom, u ovjerenom duplikatu, od čega jedna kopija ostaje Elektrotehničkom fakultetu u Sarajevu, a druga kandidatu.

Prijemni ispit nije eliminatoran, odnosno nije propisan minimalan broj osvojenih bodova na prijemnom ispitu, kao uslov za upis.

Tačni odgovori na prijemnom ispitu vrednuju se sa 2 boda, netačni odgovori oduzimanjem (umanjenjem broja bodova) za 0,5 boda, dok se zadaci sa neponuđenim odgovorom vrednuju sa 0 bodova. Konačan rezultat prijemnog ispita (broj ostvarenih bodova) se ne vrednuje sa negativnim brojem ostvarenih bodova, u slučaju da je umanjeње broja bodova za netačne odgovore veće, u odnosu na tačne odgovore i neponuđene odgovore, već se u tom slučaju konačan rezultat prijemnog ispita i ostvareni ukupni bodovi na prijemnom ispitu vrednuju sa 0 bodova.

Broj ponuđenih odgovora za svaki zadatak na prijemnom ispitu je pet.

- **rezultata ostvarenih na takmičenjima** učenika srednjih škola iz predmeta matematika, fizika i informatika

- Za jedno od osvojenih mjesta na lokalnom (općinsko, gradsko) takmičenju učenika srednjih škola, dobija se sljedeći broj bodova:

- za osvojeno prvo mjesto – 2 boda,
- za osvojeno drugo mjesto – 1 bod i
- za osvojeno treće mjesto – 0,5 bodova.

- Za jedno od osvojenih mjesta na kantonalnom takmičenju učenika srednjih škola, dobija se sljedeći broj bodova:

- za osvojeno prvo mjesto – 3 boda,
- za osvojeno drugo mjesto – 2 boda i
- za osvojeno treće mjesto – 1 bod.

- Za jedno od osvojenih mjesta na takmičenju učenika srednjih škola na nivou entiteta i Bosne i Hercegovine, dobija se sljedeći broj bodova:

- za osvojeno prvo mjesto – 4 boda,
- za osvojeno drugo mjesto – 3 boda i
- za osvojeno treće mjesto – 2 boda.

- Za jedno od osvojenih mjesta na međunarodnom takmičenju učenika srednjih škola, dobija se sljedeći broj bodova:

- za osvojeno prvo mjesto – 5 bodova,
- za osvojeno drugo mjesto – 4 boda i
- za osvojeno treće mjesto – 3 boda.

Ukupan broj bodova, a koje kandidat dobija po osnovu takmičenja, formira se na osnovu zbira bodova po svim rezultatima, s tim da se boduju samo takmičenja koja su zvanično organizirana na nivou općine, grada, kantona, entiteta i Bosne i Hercegovine i to iz predmeta: matematika, fizika i informatika.

Pored navedenog, boduju se i rezultati u okviru takmičenja pod nazivom "Smotra tehničkog stvaralaštva", koje je organiziralo Ministarstvo za obrazovanje, nauku i mlade Kantona Sarajevo.

IV

Za kandidate iz država nastalih raspadom bivše SFRJ za bodovanje ostvarenih rezultata na takmičenjima će se primjenjivati odredbe utvrđene tekstom Konkursa za upis studenata u prvu godinu prvog ciklusa studija na Univerzitetu u Sarajevu, u studijskoj 2017/2018. godini, uz primjenu principa ekvivalencije (lokalno = općinsko, gradsko; kantonalno = županijsko/regionalno, regije unutar države; entitetsko = pokrajinsko i ostalo; državno = državno).

V


Kandidatima koji su imali odličan (5,0) uspjeh iz svih nastavnih predmeta i primjerno vladanje u toku cjelokupnog srednjoškolskog obrazovanja, dodjeljuje se 5 (pet) bodova.

VI

Ostali kriteriji i mjerila za utvrđivanje redosljeda prijema kandidata za upis u prvu godinu prvog ciklusa studija, biće utvrđeni Konkursom za upis studenata u prvu godinu prvog ciklusa studija na Univerzitetu u Sarajevu u studijskoj 2017/2018. godini i Odlukom o kriterijima i mjerilima za utvrđivanje redosljeda prijema kandidata za upis u prvu godinu prvog ciklusa studija na Univerzitetu u Sarajevu.

VII

Ova odluka stupa na snagu danom donošenja.



Dostaviti:

1. Komisija za prijem i upis studenata u prvu godinu prvog ciklusa studija
2. Komisija za provođenje prijemnog ispita
3. Uz zapisnik
4. a/a